

Inlaaiden: Wie bevinden ons in t hoes van Doetje Klaain. Doetje woont soamen mit zien ongetraauwde zuster in n aarbaaidersshoeske. Hai is waarkloos. Soamen mit zien kammeroad en buurman Fred Buurman ondernemen ze van alles om t wat beter in t leven te kriegen. Veldwachter Willem Koegel is doarbie n geduchte tegenstander. Vandoage de eerste ofleveren.

Eerste bedrief.

1^e toneel *Doetje* *Fred*

Wat je zain

Doetje:

ligt op bère onder n aantal dekens

rekt zok oet en kikt op zien allozie

komt langsoam van bère of, bekikt zok even goud en trekt n verboasd gezichte

Doetje gaat op d'raante van d' bère zitten, gaat weer liggen en stapt den weer op dele

dut n stap opzied

Doetje trekt wat onverschilleg mit d'sholders

kikt angsteg noar t wasblikje dat op toavel staat

dut ain vinger in t wasblikje en schudt zok wat

Wat je heuren

Acht uur? Ist al acht uur.

Doetje, Doetje, doe hest dien tied weer versloopen, mien jong.

Doetje, nou mout ik die veur de twijde moal al bie de schobbejakken hebben. Bekiek die es goud, man. Hou komst doe van d'bère of.

Eerst d'rechter en den mien linker bain.

Doe haalfzeuven. Ik bedoul, dast es kieken moust mit wat veur klaaiier dast opstoan bist. Hest dien gewone klaaiier nog aan. Dat kin toch nait, kist toch nait overdag en snachts in dezulfde klaaiier lopen.

Joa, joa . . . joa, hest groot geliek. Zo het moeke ons dat vrouger nait leerd. Mor ja, moeke is der ja nait meer.

Hou ik guster op bère beland bin, doar kin ik mie nou niks meer van erinneren. t Liekt wel ain groot duuster gat. Meschain dat n flinke does mie weer terogge brengen kin op dizze wereld.

Oeregaai, wat kold. Doar lopt mie de griezels van over de graauwel man. t Is traauwens ook old wotter en old, kold wotter is nait goud veur de gezondheid. Zee mien moeke vrouger aaltied.

Wat je zain

*Doetje lopt noar d'raante van t
toneel en gooit zien (leeg!) teiltje
leeg, laagt wat en gaat bie toavel
zitten*

*strikt wat deur t hoar, kraabt zok op
de borst en aan de kont*

*kovviekan staat op petreuliestel optheekastje. Doetje pakt
n kopke, kikt ter in, trekt n vies gezicht, pakt n zaddouk oet
d'buutse en veegt hom schoon, lopt noar de toavel en schenkt
zok n kopke kovvie in en wriift zok in d'handen*

*dut hail aarg verboasd as e de kovvie in t kopje schonken het
en n slok nomen het*

Fred:

strompelt d'koamer binnen

Doetje:

haile rusteg

rekt zok oet

Fred:

laagt

Doetje:

wacht even

Fred:

moakt n geboar mit doeme en wiesvinger noar t publiek

Wat je heuren

Je dochten echt dat je n kolde gobbe over joe hìn kriegen zollen, hè.

Zo!

Eerst mor even n kop kovvie. Om tenminnent goud wakker te worden.

Kold? Nou, ja, van kolde kovvie worden je toch knap. Nait?

Moi, Doetje, bist al wakker?

Nee, doe wel.

Ik heb vanmörge n beetje problemen mit t opstoan.

Vanmörge?

Nait zo wies mien jong.

Mor ik heb ook nog n aander probleem, n veul groter probleem

Dat huifst mie nait te vertellen, da's old nijs.

Wat je zain

Doetje:

dut net of e niks heurd het

lopt swierend over t toneel

*gaait weer bie toavel zitten en
schudt wat mit d'kovviekane*

Fred:

gaait zitten en draait zok n shaggie

*nemt n slok en trekt n verheerlekt
gezichte*

Doetje:

vaalt hoast van d'stoule van verboazen

Fred:

Doetje:

Fred:

Doetje:

Fred:

is opstoan en lopt te zuiken deur de koamer

Doetje:

Fred:

Doetje:

Fred:

Wat je heuren

.....en dat is, dat ter aal aine is dij mie aan de kop zeurt over mien klaaier.

Snapst doar nou wat van? Terwiel ik toch mien schierste pak aan heb.

Hest zin in n kop kovvie?

Joa, lekker man.

Ik bin doar vanmörge thoes nait aan toukommen. Dou'k wakker wui, was mien eerste gedachte, da'k hier noar tou mos.

Ha, lekker!

En ?

Wat en?

Het plietsie hier al aan deure west?

Wat vertelst mie nou. d'Plietsie aan deure? Woarom zol onze veldwachter Willem Koegel hier bie mie wezen mouten? Hai het hier toch niks te zuiken.

Woar hest dij zak stoan?

Hebben we t nou nog aal over dezulfde.

Over welke zulfde.

Over Willem Koegel, natuurlek. Onze onvoltrovven speurder.

Nee, doe haalfmale, ik heb t over dij zak eerappels, dij ik gusteroavend bie boer Klaassens oet de dobbe hoald heb en hier de koamer in krood heb.

Wat je zain

Doetje:

Fred:

gooit wat kranten en n klaaid opzied en ropt haard

Doetje:

gaait noast hom stoan

Ze lopen terogge noar de toavel en Doetje schopt per ongeluk tegen de po aan, dij haalf onder d'bère staait en der vlogt wat broens oet. Hai veegt t mit d'voute onder d'bère. Schudt wat mit t heufd

Fred:

Doetje:

Fred:

Doetje:

Ze gaan zitten

Doetje:

Fred:

stek zien aarms in de locht

Doetje:

Fred:

Wat je heuren

n Zak mit eerappels? In hoes krodén? Wolst doe zeggen, dat hier in d'koamer n zak mit eerappels staait en dast doe dat op dien gewaiten hest?

Hier staait e ja.

Moust noagoan, n zak mit eerappels in mien aigenste koamer. Ik docht vanmörge al dou'k wakker wui, wat stinkt dat hier in d'koamer. Mor dat waren dizze eerappels dus.

Nou snap ik dus woar t votkomt.

Wat bedoulst.

Dou ik vanmörge wakker wui, docht ik dat ik riek was.

Haarst zeker dreumd, dast n pot mit golden munten vonden haarst.

Nee, man. Minsen zeggen toch aaltied, dat geld stinkt en vanmörge kreeg ik toch zo'n bled gevoul, dou ik mie gewoar wui, dat t hier zo stonk in d'koamer

Mor nou even alle gekhaid op n stokje, Fredrikus. Woarom hest doe dizze mud eerappels bie mie thoos brocht.

Doetje Klaain, as'k nait beter wos, zol'k zeggen dast last haarst van oaderverkaalken. Wie hebben gusternommedag toch ofsproken, dat we perbaaiern zollen om weer olderwetse foezel te moaken.

Foezel? Doe bedoulst dij olderwetse eerappeljenever?

Joa, doe bist toch aaltied aan t zemeln en jeuzeln, dast gain jenever meer kopen kist.

Wat je zain

Doetje:

*kikt noar de plaanke boven zien
bère en zegt zieleg*

kwoad mit de voeste in de locht

Fred:

ropt ook haard

Doetje

*Hai lopt nog es noar de zak mit eerappels en kikt mit n vies gezichte
in de zak*

kraabt zok wat op d'kop

Fred:

Doetje:

kikt noar de plaanke mit lege fleskes boven zien bère

Fred:

Doetje:

*lopt noar zien bère tou en draait
van n aantal flèzen de doppe of
en holdt ze op de kop*

Hou t verder gaat mit de jeneverstokerij? Zolt heur lukken de foezel te moaken of hebben ze eerst nog wat aans te verhapstokken? Dat lezen ie de volgende keer.

Wat je heuren

Nee, as je waarkloos binnen en je mouten leven van de soos den kinnen je joe gain flèze jenever meer veroorloven.

Zulms zo'n klaain fleske zit ter nait meer aan.

Da's allaind mor weglegd veur de rieke stinkerds hier in t dörp.

Joa, veur de kapitalisten. En zokse aarme sloebers zoas wie, dij mouten t doun mit kolde kovvie en putwotter.

Mor eh....

As ik het goud begriep hest doe dij eerappels mitnomen om der dammeet jenever van te stoken. Den is dat dus de reden, dat dij zak hier in d'koamer staat?
Joa, Freddie, langsoamerhaand begunt t mie n beetje te doagen, trekt de mist wat op.

As ik die zo heur, liekt het ja net ofst n dikke koater hest, man.

Hou kist nou n koater hebben ast gainains n borrel schenken kist. Ast nait ains n borrel in hoes hest.

En dat den?

Wast doar zugst, binnen allendeg mor lege flèzen.

Aalmoal leeg en gain druppel alkohol.